

開放文學－歷代筆記－夷堅丙志 第五卷

李明微 李明微法師·福州人·道戒孤高·為人拜章伏詞·報應甚著·紹興五年·建州通判袁復一·使與天慶觀葉道士·同拜醮·既罷·謂葉曰·適拜章時·到三天門下·見此郡張道士·亦為人奏青詞·函封極草率·又已破碎·天師雲·此不可進御·擲去之矣·葉曰·張乃觀中道侶也·但不知今夕在誰人家·明日·張自外歸·葉扣其所往·曰·昨在二十里外葉家作醮·村民家生疏·青詞紙絕不佳·及焚奏之際·架復傾側·詞墜於地·吾急施手板承之·賴以不甚損·然鶴髦遂遭爇·葉為話明微所見·張甚懼·即日自具一醮謝罪雲·

虢州驛舍

宣和中·虢州路分都監新到官·以代者未去·寓家於驛·日未晡·會食堂上·白氣從廷下井中出·勃勃如霧·須臾青衣女子出於井·歷階而上·遍視坐人·丫髻森如·目光可鑿·已而入西邊小室·沿壁而升·遂失所在·舉室皆悚·至夕不敢寐·二鼓後·門窗無故自辟·由外入者紛紛·亦未疑為怪·就視之·面目衣冠·盡與一家人不異·而家人所見·又皆類都監·憧憧往來·莫知孰為人·孰為鬼·雖有刀劍·懼誤傷人·不敢擊·達旦方止·老幼驚怖如癡·即日徙出·後月餘·緡雲人陳汝錫·來通判州事·方葺官舍·亦暫泊驛中·都監者具以前事告·陳不謂然·過三日·群婢悉夢魘·有見人物極大而無言者·有遭鬼物自床昇至地者·亦至曉乃止·然別無它·

葉議秀才

紹興二年·處州青田人潘紱·閩丘觀·俱為蕭山尉·同處一寺·鄉人葉議秀才·以家貧母老·來相依·日飯尉家·夜則寢僧舍·時三衢柴生·能相手紋·談禍福·視葉手·驚曰·君色殊不佳·法當殺人·否則為人所殺·近三日事爾·切勿妄出·正恐不得免焉·葉素怯懦·且方僑寄為客·與人未款曲·度必無如是事·姑應曰·諾·越三日薄暮·二尉留與飲·中夕醉歸·同室僧已寢·一盜在外·尾其後以入·發篋有聲·僧覺之·潛起·將取杖擊盜·正與盜遇·盜以刃傷僧·僧絕叫而走·葉熟睡·聞呼聲·蹶然起·盜適當前·葉急持其袂·盜慮不得脫·掣其肘曰·放我·不然·將殺汝·葉醉甚·持之愈急·盜恐眾至·乃刺刃而去·葉即死·二尉聞之·懼以是坐罪·跡捕未獲·見葉從廡下掩腹入僧房·左右無一睹者·邑有女巫·能通鬼神事·遣詢之·方及門·巫舉止言語如葉平生·大慟曰·為我謝二尉·我以宿業不幸死·今已得兇人·更數日就擒·無所憾·獨念母老且貧·吾囊中所貯·可及百千·望為火吾骸·收遺骨及餘貲與母·則存沒受賜矣·尉悉如所戒·後五日·果得盜·盜言殺業之次日·即見諸百步外·已而漸近·昨乃與同臥起·自知必敗雲·

小令村民

青田小令村民家婦·年二十餘·愚而丑·為祟所憑·能與人言·唯婦見其形·用大紙滿書其上·不能成字·貼婦房內壁·仍設一卓置香炉·如人家供神佛者·每日焚香十餘度·或沉·或檀·或柏子和香之屬·莫知所從來·富人徐勉·素木強·聞其事·特往驗之·方及門·空中語曰·好客且來·可設茶·勉已愕然·既坐·問民曰·聞汝家有鬼·胡不令出見我·語未竟·一物墜背間甚重·遂墮地·視之·則茶磨上扇也·背亦不覺痛·勉怖而出·祟以糞逐而灑之·有行者善誦穢跡咒·能祛斥鬼物·勉邀至民家·未及施術·一刈草大鎌刀·從空飛舞而下·揮霍眩轉·如人執持刀·垂及衣裾·急竄去僅免·後頗盜微物·以益其家·山間牧童·嘗窺見之·似十二三歲兒·遍體皆黃毛·疑為猴覆之屬·至今尚存·

青田小胥

建炎中·青田小胥陳某者·嘗上直·同輩三人皆竊出·陳素謹畏·獨臥吏舍·明旦·門不啟·主吏扣戶連呼之·不應·以告縣令陳彥才·破壁以入·衣衾巾履皆在·獨不見人·而窗壁整密如常時·莫能測·陳父日夕悲泣·山椒水涯·尋訪略遍·適路時中·過永嘉·道出青田·蔣存誠祭酒·方鄉居·憐其父老而失子·為以情禱之·時中命具狀·訴於驅邪院·而判其後雲·當所土地裡域真官·仰來日辰時·要見陳某下落·如係邪祟枉害生人·亦仰拘赴所屬根治·餘依清律施行·仍畫玉女於後·令焚於城隍祠·明日·去縣五里曰下浦·漁者方收網·忽潭水沸騰·聲如雷震·急棹舟岸側以避·俄頃·一物躍出·高丈餘復墜·水亦平帖·徐而觀之·乃陳胥之屍·時秋尚熱·死已旬日·而面色如生·竟不測為何祟·其身何以能出戶也·

長生牛

紹興元年·車駕在會稽·時庶事草創·有旨禁私屠牛甚嚴·而衛卒往往犯禁·有水牛頂銜刀·由禹廟側·突入城·見者辟易·廂卒慮其蹂躪·欲闌執之·為所觸幾死·時府治寓大善寺·牛逸入三門·過西廊·一馬係廊下·見牛至·奮蹄蹴之·牛怒觸其腹·腹裂·腸掛於角·怒愈甚·逢人則逐·徑詣廷中·郡守陳汝錫方治事·牛望見乃緩行·引首悲鳴·遂臥階下·陳令健卒為去刀傅藥·兀然不動·且告以立賞捕屠者·命牽付圓通寺作長生牛·即就繼而去·與常牛無以異·後數年方死·

鰲逐人

大理司直陳棣·幼嗜鰲·所居青田山邑·艱得之·隨得則食·初未嘗起念·紹興壬戌歲·夢適通衢·見鰲二十餘出水中·行甚遽·且將齧已·急走還·及門·鰲亦踵至·復趨堂上·相逐愈急·窘甚·跳登食床·鰲競緣四腳而上·棣大怖·謂曰·我元無食汝意·何為迫我·叱之而寤·明旦啟門·有村僕持所親劉元中書·致一竹畚·餉鰲二十八頭·發視之·絕類昨夢所睹·時元中新得僕·善捕鰲·赤手行水際·察沙石間·則知鰲所隱·日獲數十枚·以故親黨亦蒙惠·棣舉所餉放諸溪·自是不復食·

緡雲鱗飛

緡雲縣谿澗淺澀·尋常無大魚·漁者嘗獲巨鯉·異而獻於縣·縣令方從政·倍償其直·付庖人斲鱠·招邑官開宴共享·酒數行·絲竹在列·鱣至未及食·忽氛霧晝冥·雷雨驟至·祥中鱣縷·舞躍而出·大風徹屋脊·瓦落勢如崩·盛夏淒寒·坐客毛髮皆立·火毬如五斗栲栳大·飛集筵間·客趨避書合中·火亦隨入·電光中巨人迭往來·逾數刻雨止·屋內猶黑·秉燭視令·則與兩妓已仆地·良久乃蘇·客及從吏衣裾多焦灼·川流溢溢·逾旬始平·識者以為龍螭之類也·

西洋廟

永嘉胡漢臣·世居西洋·忽為祟所撓·始則揚沙擊石·石之所擊·自門廊洞達臥內·皆鏗然有聲·而壁戶略無小損·既久則空中與人語·時置糞污於飲食器皿中·雖買熟物亦皆然·其家良以為苦·幼女始分雙髻·見白衣丈夫·持剪刀來前·呼曰·小娘子與我頭上角·兒女驚啼間·已失一髻·漢臣從外至·抱女膝上·方泣訴·又呼曰·彼人復來剪我髻矣·急護其首·則又失其一·命道士巫覡·百計禳治·皆不驗·謀徙居避之·家具什物·悉膠著於地·雖至輕者·亦極力不可舉·弗克去·如是幾二年·因飲親戚家·大醉歸·及所居巷口·望見小廟·疑其為祟·乘醉就鄰家假巨斧·碎土偶·並香案諸物·鎖鑰其門·自是怪不作·

徐秉鈞女

永嘉徐秉鈞縣丞·有女曰十七娘·慧解過人·將笄而死·母馮氏·悼念不能釋·忽夢女坐庭中·弄博具·記其已死·呼謂之曰·自汝死後·我無頃刻不念汝·汝何得在此·女曰·不須見憶·兒已復生為男子矣·取骰子示母·曰·此葉子格也·博徒以骰子兩彩相向為葉子蓋是我受生處·他日黃土山前米鋪之鄰訪我·彼家亦且作官人·言訖而覺·以語徐·徐所居在安溪村·不知黃土山為何地·或曰·乃南郭外一虛市·去城財五里·即往尋跡·正得一米肆·其鄰若士人居·詢之·雲葉子羽秀才宅·驗與夢相符·投刺入謁·從容及其子弟·葉曰·數日前誕一男子·較其日·乃馮氏所夢之夜·具以告之·且求見其子·眉目宛與女相類·顧徐有喜笑色·子羽名之儀·明年果登科·兒十餘歲時·猶問至徐氏·常稱馮為安溪媽媽·

江安世

江安世·蘭溪人·好道士說·受篆於龍虎山張靜應天師·受法於南嶽黃必美先生·所居曰元潭村·於堂側建小室·為奉事之所·一日·雨初霽·砌下五色光十數道·直出簷間·或大如椽·或小如竹·莫知其所起·疑有伏寶·命僕斫之·過丈餘·無所睹·復填斲之·光出如故·治之以法·又不效·黃先生至其家·為作黃篆醮·埋金龍於斲下·光始絕·嘗清旦·入道室焚香·見一石當香案前·周匝皆青苔·石體尚濕·蓋方自谿澗出者·江君常時唯用二小童掃灑·他人莫得入·意童為戲·然石甚重·非二人所能舉也·不復問·但令舁著門外塘水中·明日如初·又徙置三里外大潭·而扁此室·明日親啟戶·石又在焉·默禱於神·書符其上·投之溪流·又明日乃不見·江甚喜·以為蒙符力·殃怪不敢至矣·正對客飯·有物擊堂屋上瓦·聲聲有聲·墜於庭·驗之·蓋元所見石·昨符尚存·題其旁雲·此符有未是處·反視其背·別一符存焉·與江所書小異·江自度無可奈·乃納諸室中·久之·得朱書小紙於案·曰·公既無如我何·盍圖我昆弟之形·我當助公行法·江祝曰·汝為何神·昆弟有幾·作何形相·果能助我行法·當明告我·復有片紙曰·我三靈官也·悉以狀貌衣冠告之·江不得已·為圖像置壇側·其家亦時時遇之·由是生計頓替·二年江亡·怪亦絕·

蘭溪獄

蘭溪祝氏·大家也·所居去縣三十里·一子甫冠·頗知書·宅之側鑿大塘數十畝·秋冬之交水涸·得枯骸一具·於岸邊樹下·莫知所從來·鄰不敢隱·聞之裡正·先是有道人·行丐至祝氏·需索無厭·祝怒·驅使出·語不遜·祝歐之·道人佯死·祝蒼黃欲告官·迫夜未果·道人知不可欺·遂謝罪去·裡正夙與祝氏訟田有隙·遂稱祝昔嘗極人至死·今屍正在其塘內·以白縣·縣宰信以為然·逮下獄·凡證佐胥吏訟其冤者·宰悉以為受賂托·愈加繩治·笞掠無虛日·祝素富室·且業儒·未嘗知官府事·不勝慘毒·自誣服·其母慮不得免·迎枯骨之魂歸家·焚香致禱·日夕號泣·且揭榜立賞·募人捕真盜·縣獄具·將上之郡矣·前所謂行丐者·在鄂岳間·欲過湘·南陟衡岳·夢人告曰·子未可遽行·翌日將有來迫者·寤而異之·及明·別與一道流相遇·市酒共飲·問其從何來·有何新事·曰·吾從婺州來·到蘭溪時·聞市人籍籍談祝家冤事·因具語之·丐者矍然曰·詐之者我也·我坐此罪·固已得譴於幽冥·今彼繫囹圄·死在旦暮·我不往直之·則真緣我以死·冤債何時竟乎·乃強後來者與俱東·兼程抵婺·自列於縣·縣宰猶謂其不然·疑未決·已而它邑獲盜·訊鞫間·自言本屠者·嘗賒買客牛·客督直甚急·計未能償·潛害客·乘夜置屍祝氏塘中雲·祝於是始得釋·

桐川酒